

Newspaper	Utusan Malaysia
Date	19 August 2015

Sangkal propaganda buruk terhadap kerajaan.

Malaysia bukan negara gagal - PM

UM - 19/8/2015

Oleh **HUSSAINI AMRAN**
hussaini.amran@gmail.com

■ KUALA LUMPUR 18 OGOS

DATUK Seri Najib Tun Razak menegaskan, Malaysia bukan sebuah negara yang gagal seperti didakwa oleh pihak tertentu.

Perdana Menteri berkata, dakwaan itu dilihat sangat ironi kerana negara ini sebenarnya sedang berada di landasan yang betul menuju kecemerlangan.

Menurut beliau, agak menghairankan apabila Malaysia yang dikatakan sebuah negara gagal pada hakikatnya mengungguli Petunjuk Ekonomi Islam Global (GIEI) 2014-2015.

“Kajian ini mengatakan Malaysia mendahului dengan margin yang besar dari sudut nilai ekosistem ekonomi Islam.

“Sistem perekonomian Islam kita dikatakan sebagai yang paling matang. Sektor halal kita juga begitu malah kita antara negara yang mengungguli bidang farmaseutikal,” katanya ketika menyampaikan ucapan dan merasmikan Seminar Antarabangsa Wasatiyyah 2015 di Dewan Jubli Institut Penilaian Nega-

ra (Inspen), Bangi dekat sini hari ini.

Yang turut hadir, Penasihat Agama kepada Perdana Menteri merangkap Pengerusi Institut Wasatiyyah Malaysia, Tan Sri Dr. Abdullah Md. Zin.

Najib menambah, berdasarkan laporan sama, Malaysia juga mendahului negara-negara lain dari segi kewangan Islam.

Beliau turut mempersoalkan sama ada Malaysia layak digelar negara gagal sekiranya kerajaan menjaga matlamat maqasid syariah dan pada masa sama, negara ini hampir berada di tempat teratas dalam kerangka nilai seperti Laporan Persaingan Global serta Laporan Mudah Menjalankan Perniagaan Bank Dunia.

“Apakah kita ini negara gagal bila kita bercakap tentang kesaksamaan dan keterangkuman ekonomi hampir setiap masa dan hari?” ujarnya.

Perdana Menteri juga bertanya sama ada semua pihak pernah menilai dengan adil bagaimana sebahagian besar sumber dan dana kerajaan disalurkan bagi membina akal serta minda rakyat.

“Apakah sudah menjadi dosa bila kita membantu dan menyusun jaringan keselamatan sosial kepada rakyat miskin serta kurang ber-

ada?” katanya.

Sehubungan itu, beliau kesal apabila segelintir generasi muda seolah-olah lebih mempercayai propaganda dan label buruk yang mungkin disuntik oleh musuh-musuh Islam terhadap kerajaan.

Najib berharap, generasi muda di negara ini tidak sewenang-wenangnya menjadi pembawa berita kononnya negara sedang menuju jalan song-sang dari segi ekonomi dan politik.

“Mudah untuk kita memberi label tetapi apakah mudah untuk kita meletakkan negara kita dalam kalangan yang diakui hebat dan berpandangan jauh?” katanya.

Beliau mengakui kerajaan bukan sempurna dalam semua perkara, namun generasi muda sewajarnya bersikap adil dalam membuat nilai-an dan sanggahan.

“Kita boleh berbeza pandangan namun ia mestilah dilakukan dalam keadaan saling menghormati dan tidak mencemarkan nama baik negara serta agama,” jelasnya.

Perdana Menteri memberi jaminan beliau tidak akan menutup ruang bagi rakyat termasuk generasi muda untuk memberi kritikan dan sanggahan.